

## Agentura Allianz pyta serbskeho wučomnika Z klientami maćeršćinu nałožować

**Kamjenc (SN/mwe).** Po dokładnym rozmyslowanju a wuslědku rozmołwow ze zapóslancom Sakskeho krajneho sejma Alojsom Mikławškom (CDU) kaž tež z Budyskej agenturu za džěło je so André Hanisch z agentury Allianz rozsudził, zo poskići zajimcam w swojej zawěsćerni w Kamjencu wukubłanske a krute džěłowe městno. Zaměr je młodostnym z regiona w domiznje perspektiwu skićić.

„Chcu k tomu přinošować młodostnym šansu dać, zo bychu w regionje wostali“, André Hanisch minjeny pjatk na zetkanju z nowinarjemi zwurazni. Jara wažne jemu je, zo wobknježitaj wučomnik a přistajena serbsku rěč. Wšako je mjez jeho klientami tójšto Serbow, kotrychž chcedža w agenturje po možnosćitež w maćeršćinje poradžować. Po wu-

kublanju bychu serbskeho młodostneho w agenturje Allianz kruće přistajili.

Zhromadne prócowanje Alojsa Mikławška a Andréja Hanischa je dopokaz, zo móža politikarjo předewzaćelam při pytanju dorosta pomhać. „Jako běch njedawno z kolesom w serbskich firmach po puću, mi wšudže prajachu, zo trjebaja nuznje wučomnikow, zo pak běchu wšitke prócowanja, tajkich nańć, dotal podarmo“, na zeńdženju přitomny Mikławšk rjekny. Tuž chce wón tež w přichodze za pućemi pytać, kak móže rjemjeslnikam pomhać. Alexander Ulbricht, nowinski rěčnik Budyskeje agentury za džěło, zdžěli, zo chcedža hišće zaměrnjo ze šulemi hromadze džělać, zo bychu młodostni sčasom wo swojej powołanskej perspektiwje rozmyslowali.